



PORTAVÓS
VI GOVERNUN
KONSTITUSIONÁL



**KOMUNIKADU
BA MEDIA**

Díli, Loron 18 fulan-agostu tinan 2017

Komemorasaun aniversáriu FALINTIL da-42

Iha loron 20 fulan-agostu, komemora aniversáriu da-42 FALINTIL, Forsas Armadas ba Libertasaun Nasionál Timor-Leste nian.

Governu espresa ninia respeitu kle'an no gratidaun ba FALINTIL no fó ónra ba Kombatente Libertasaun Nasionál nian sira ne'ebé, ho aten-barani no sakrifísiu, durante luta iha tinan 24 nia laran, lori Timor-Leste sai livre no independente.

Husi loron 7 to'o loron 18 fulan-agostu, hala'o ona eventu oioin iha ámbitu selebrasaun loron FALINTIL nian. Kompetisaun desportiva "Taxa FALINTIL", ho jogu entre ekipa husi ministériu oioin, hala'o ona iha Kampu Futsál, iha Fatuhada, Dili. Iha sábadu, loron 19 fulan-agostu, sei hala'o Misa Agradesimentu iha Igreja Santu António (Motael), hodi fó ónra ba eroi nasional sira, tuir kedas ho Serimónia tau aifunan iha Jardín Eroí, iha Metinaru.

Iha domingu, loron 20 fulan-agostu, hala'o serimónia prinsipál iha Kuartél-Jenerál F-FDTL nian, iha Fatuhada. Entre bainaka sira ne'ebé sei mai asisti serimónia ne'e maka representante nivel aas militar nian husi Portugal no husi Austrália no pesoál militar, veteranu no diplomata sira husi mundu tomak.

Programa ofisiál ne'e inklui serimónia Hasa'e Bandeira, parada militar no atribuisaun prémiu no promosaun militar sira nian. Sei iha mós diskursu husi Prezidente Repúblika no Komandante Supremu Forsa Armada nian, Francisco Guterres Lú Olo, no Xefe Estado-Maiór-Jenerál Forsas Armadas nian, Majór-Jenerál Lere Anan Timur.

Serimónia ne'e remata ho apresentasaun ida husi estudante sira ne'ebé partisipa iha marxa husi Ainaru to'o Dili, hodi fó omenajen ba aniversáriu da-42 ne'e, tuir kedas ho apresentasaun muzikal no demonstrasaun militar ida.

Portavós Governu Konstitusionál VI nian, Ministru Estadu Agio Pereira, hateten katak "iha loron hirak tuirmai ne'e ita sei hanoin fila-fali FALINTIL no ema hotu ne'ebé hala'o knaar iha sira nia fileira. Ohin loron, lorumatan sa'e no loron monu kona Timor-Leste ida ne'ebé livre no moris iha pás tanba sira-nia sakrifísiu no aten-barani. Ita fó ónra ba sira. Ho espírito FALINTIL nian mak ita hatene sa'ida maka hadomi no sa'ida maka serbí no, ho inspirasaun husi sira-nia dignidade no determinasaun, ita hakat ba oin, hodi serbisu hamutuk atu harii ita-nia Nasaun." **REMATA**



Agio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl